

珂雪齋外集

珂雪堂外集卷之四

公安阜

游居柿錄

萬曆三十八年庚戌正月初一日寓石駙馬街  
中郎兄寓中郎早入朝午始歸予過東寓偶  
于姑蘇會館前逢韓求仲賀函伯曰此中有  
少宴集幸同入是日多生客不暇問姓名聽  
吳優演八義

夜夢蓮池上人示寂予與中郎皆輿往弔其後  
尚有十餘人俱縗經旣至知客曰公等與上  
人素相知耶予通名其人愕然不知何祥也  
蓮池杭人以諸生出家後住雲棲專接引人  
念佛行解甚穩予素未見之不知何以入夢  
至極樂寺王石洋寓中見王辰玉二律書卷上  
中有雪中烏乳分齋鉢月下僧歸及梵鍾殘  
燈貝葉翻香蠹春日簷花坐語禽皆佳境也  
閒步溪邊看冰時風日甚佳凍枝內時有着袂

人皆中貴往萬曆寺者

受之云生平知交有一顧朗仲今已死矣予與  
朗仲亦素相聞恨未識面朗仲名雲鴻舉應  
天庚子鄉薦受之偶取其藤溪雪菴記一首  
示予予嘆曰天假以年所造未可量也

極樂寺左有國花堂前堂以牡丹得名記癸卯  
夏一中貴造此堂旣成招石洋與予飲伶人  
演白兔記座中中貴五六人皆哭欲絕遂不  
成歡而別

吳客言及崑山王明佐事明佐初名治後名逢年字舜華父王太史同祖與袁元峰先生爲密友明佐後孤入都元峰甚憐之念故人子當厚之且爲謀一官一日偶以手書遺明佐令代作古文詞三首明佐以一小赫褫題數字荅曰足下以時文取科以青詞拜相烏知所謂古文詞者哉元峯嗤其狂後竟落魄而歸家素溫腴田數千畝盡賣去後有人持一古琴云此卽蔡中郎焦尾琴也明佐信以爲

然以二百金購之極其寶惜後家貧更思寘  
田乃以琴求售于王弇州云但得原直取腴  
田以老足矣弇州視琴僅可二十金而難于  
辭之語弟敬美曰王君持琴來若辨其非漢  
焦尾少與之直彼必不快將奈何敬美曰但  
以付弟明日明佐至敬美語之曰昨月夜坐  
松下取公焦尾彈一曲雲中忽有二美人冉  
冉而至曰上帝勅取此琴予不敢恡二美人  
捧之而去俄入雲中不見舜華大喜曰信神

王右軍集卷之十一  
物不可久留世奇矣奇矣後竟不問琴所在  
敬美仍以三十金作一贐儀送之以歸人後  
問焦尾安在舜華曰此琴在我家中久有去  
意果然不肯留也明佐詩甚佳書法尤工晚  
年微示疾自以所書金剛經寘之懷坐化而  
去予謂此老真有米海嶽風氣不易及也客  
又云當僞吳時有金氏女十餘歲能前知張  
士誠奉爲神明取之入室依其母旣長絕美  
欲納爲后不可將盡殺其家金氏許之曰太

夫人實鞠養我辭太夫人去至則拜士誠母  
于牀下化去矣士誠大驚乃以藉沒常熟富  
民曹百萬貲財爲治塚墓今常熟猶有金姬  
塚云先輩楊儀曹傳甚詳予家有之又言近  
日吳孺子事吳孺子不知何許人酷好古藤  
每入溪山尋藤或數月不出未盡則取生蔬  
啖之得藤以爲杯爲如意爲佛菩薩爲龍鳳  
曲盡其妙或聽泉樂之則竅日夜人不與之  
食不求食也此皆異人不可不識



同受之函伯至法華寺看求仲求仲曰予數夢至此寺看牡丹似是好消息也

考功事竣中郎以謝恩先出以字招予夜飲上元日過燈市覓長孺同往則已先去久矣至市喧闐不可步覓長孺于酒樓有自密雲來者予急訊蹇大司馬別後事曰去後蹇大司馬謂予曰小脩不至矣吾兒亦欲歸西川畢姻二月中遂遣公子偕其母歸旅次止一幼姬至六月病作自謂背上有小毒不知其爲

背發也數日後徵醫視之不治矣卒之夜城中砲響者三甲馬之聲轟然大小營中皆錯愕以爲有他變頃之寂無所有徧訪砲響處不可得卽大司馬瞑目時也

中郎出手卷一乃范寬雪景後有跋云此宋畫苑范公筆大長公主書府秘藏之一日命前集賢待制海粟馮子振等題跋爲天下古今之名畫也子孫宜寶之東平兀顏思敬跋又有跋云范公畫法爲當朝所推老入精妙此

尤得意之筆凡三見之兒子稷近得特藏之  
東里楊士奇識按馮海粟亦學禪中峯語錄  
有與論禪書尤爲詞曲當家

中郎出二卷其一爲蘇子瞻草書醉翁亭記放  
筆淋漓而結法甚密俱是三蕉葉後從十指  
中出者此書乃新鄭家藏後傳之江陵再傳  
之家舅龔侍御惟長名仲慶所惜後有趙文  
敏諸公跋俱爲人取去中玄曾勒石今石刻  
與此本分毫不異其一爲趙文敏公洛神賦

見此字乃知趙公書法出于二王奕奕神令  
後人所不能模擬者

廿六日得黃平倩書云兩得兄書亦得三哥書  
具省相念至意弟體幸漸可終恨左不如右  
耳昨日聞陶周望卽世懷抱惡甚道侶彫零  
乃爾人世孰可把玩憶壬寅別時欷歔恐不  
復相見今果然矣兄書言前得陶兄書似有  
所得不審臨化得力與否弟索居日久嘗虞  
墮落安得傳翼以破七年之積結耶閒居歲

久赤貧自憐卽欲買舟下峽以赴兄約亦未  
易然且賤體亦未堪遠涉也世事悠悠四顧  
增嘆惟當精勤大事于明歲內乃可遠遊耳  
倘緣數如意得奉二兄教有所省發當結廬  
于無喧處或禪或淨必有所就免得臘月三  
十夜又載一肚獐獍去也三兄高捷後能圖  
一便差就我荒落乎

赴順天癸卯同年大會于錢戚畹宅予連坐爲  
都中王黍谷名嘉詔與予同門其兄名嘉謨

丙戌成進士爲无兄伯脩同年舊傳此公知  
前因予備問之黍谷曰有之世傳殆過甚當  
家兄未生時順城門內有一老人某好善臨  
命終時瞑去忽蘇曰我當託生豹韜衛王指  
揮家作兒此善人家也生後三日汝輩可來  
視我遂歿歿之時卽家兄生時也後三日其  
子來視且言故家兄見之淚落自後每見輒  
頭眩半日不省人事遂絕往來

春塲畢後倦卧楊脩齡至坐牀上少話卽去甫

梳櫛晉中左方伯黃梅汪靜峯可受至強欲  
讀文予數辭汪必不去不得已爲讀一過汪  
甚許可月夜中郎同胡仲脩陶孝若來袖文  
而去孝若應入塲苦其勞不入亦覺條然  
陶孝若來道及張玄真事孝若曰張志和隱于  
祁門今有張村人相傳于祁門仙去志和踪  
跡晚在吳興不知何以復在祁門

表弟龔蒼嶼來云偶與同鄉生譚云萬事前定  
予頭塲倦臥忽見二十一號者爲一鬼所扶

予驚而往訊之其人不覺私識其名昨日遂帖出乃信場中有鬼神也

新安太學吳嗣先處見大李將軍棧道圖上有宣和印趙千里秋高牧馬圖子昂馬鮮于伯機柯敬仲題跋李成老柳繁藤有米元章審定印又有大原琬玩王良史章又有大李將軍宮殿雪景

順城門外李戚畹園寬可五百畝種牡丹可三十畝內有老槐虬枝盤曲因架二亭其上五



六日前蒼嶼作一夢云弟見兄至一園甚繁  
華內有大樹架屋可坐今日偶見此與夢境  
正合亦一異事

左心源侍御邀中郎雲浦謝青蓮陶不退與予  
聚于慈惠寺僧真貴號愚菴蜀人與黃慎軒  
爲法契出慎軒札二冊有意無意之間筆跡  
甚工予謂愚菴當摹上石以垂永遠耳心源  
云人生隨其所居之位皆當有成章處若進  
退無據與世俯仰碌碌奔波則爲庸人予深

服其言

吳嗣先寓見閭立本職貢圖賈秋壑收藏閭立  
德鎖諫圖宣和賞鑒趙子昂自書竹賦并畫  
竹李龍眠臨閭立本度人經變相圖王叔明  
畫松風閣前有無準和尚題松風二字後有  
楊維禎顧阿暎劉伯溫詩宋景濂記僧宗泐  
五言古詩姚廣孝七言古詩并跋語

隨中郎南歸辰出春明門送人頗多予皆未及  
晤至廬溝橋水涓涓流卽古桑乾水也輿中

望西山一帶猶露雪痕晚抵良鄉風大作有  
寒色時友人李素心弟雪里亦同歸夜同榻  
抵足共嘆求名之苦予欲葺山居爲終老計  
而素心有志香光之業矣

從此有記互有異同故并存之

雪大作報人不至遂行至琉璃橋白石砌成可  
三里許極爲壯麗其下卽古所云聖水也水  
出上谷東逕玉石山過良鄉縣逕羊頭阜合  
于涿州桃水至河間入海晚至涿州得全錄  
相知得雋者頗多而荊州一郡皆落意頗不

快久之始定輿中寒甚懷抱甚惡自念已四十餘矣常奔走場屋勞苦不堪捨之又不能真是前生業緣

安肅道中雪晴出城數里見流水一曲西望遠山甚秀冶

風大作輿中見枝影滿地如月夜拭眼讀書亦甚快過石橋流水清碧午抵保定府清苑縣過涇陽驛壁間有李大司馬霖寰四絕中二首云短牆小屋柳垂垂二十年前此咏詩今日

重來無覓處空餘烏鵲繞寒枝南去北來在  
自嗟閒愁贏得鬢生華數行遺墨猶難保何  
况玄都觀裡花壁間多有和者因憶庚子中  
郎以祠部出使周藩予以順天鄉舉不第同  
過此駟見壁間有臨漳令王子聲一鳴一詩  
云初日照騎馬悠悠旌旆搖孤臣長糞土萬  
事隔雲霄朱檻抱風葉寒蟬喧暮條端居念  
天地疎濶一題橋今亦不見矣子聲初爲大  
湖令後爲臨漳令竟不振以死中郎因以詩

弔之云只合臨漳死曹家鬼好文楓根猶有  
繡夜壑豈無春硯乞銅臺瓦姻求洛浦甄歌  
遺塗粉客衣逐買香人客鬼輕殘蛻騷宮重  
楚魂生灰旦晝理夜樂勝朝輦予亦作一詩  
後遺失亦不知何語也晚宿慶都堯母墓墓  
如崇阜正方登其顛望一城如小孟西北諸  
山秀妍訊之則唐縣完縣諸山也

從慶都發過清風店涉唐河至定州州學觀子  
瞻雪浪石盛以石蓮花盆石黑質而白章奔

騰如浪雪浪二字非此石不能當亦非子瞻  
不能名也其盆邊周遭有字云畫水之變蜀  
兩孫與不傳者歸九原異哉駁石雪影翻石  
中乃有此理存玉井芙蓉丈八盆伏流飛空  
漱其根東坡作銘豈多言四月辛酉紹聖元  
字畫未經摹搨神理甚完旁有一槐中空外  
裂似亦子瞻時植也前廡下刻王摩詰墨竹  
又有雪菴書六言詩雪菴卽書茶楊者元至  
正大德間有僧雪菴以大字楷書名于世其

臨蘭亭爲牟大理趙子昂所賞卽其人也午  
後過劉禹錫陋室光武雞鳴城

從新樂發過伏羲生身處憇伏城駟日暮抵真  
定府城中空濶如郊野

從真定府早發過蘇味道故里窺武子舊封漢  
蒲棘侯柴武臺宿樂城

憇于趙州院看吳道子畫水一壁覺洶洶有奔  
屋之勢然壁已久恐亦臨筆耳過張兵部去  
華居仁宅嘆息者久之去華舊與黃太史平



情善已亥以補官入都一日予與丘長孺偶  
會平倩平倩曰今日有酒豪張去華見過度  
不能獨當之二兄可來陪飲後同飲去華逃  
去已不能上馬矣去華左官出爲蜀藩幕官  
從征播功成而去華病死其人有奇氣且學  
禪過王莽城宿于栢鄉是日有饋南和刀酒  
者清冽如泉當爲北酒第一春已深今日方  
見綠艸及柳條江南之興勃勃

從栢鄉至內丘一路多風沙道中見民有菜色

中有臨城縣界立石卽子瞻所云南遷必返  
從臨城道中望西山草木可數者也今日沙  
霧不見大行晚宿內丘中卽云昨夜夢與人  
說禪云說現前卽是的也非說現前皆非的  
也非又夢與僧無念說禪云你道譬如鹽耶  
大風沙石皆飛欲游太子巖不果

過宋璟墓午過沙河積沙如雪可十里許是日  
始見柳條含萼桃李晚度洛水宿于關天氣  
漸煖共坐大槐下飲洛酒

臨洛道中日清和見游女攀楊柳採其苗者甚多蓋儉歲爲蔬故也至黃梁祠晤肥鄉金吾張念堂名懋忠兄弟劇飲而別

從邯鄲過河是爲中州交界處頗有崗巒楊柳垂絲桃杏盛開晚宿于磁州吳本如偕蔣子厚從五臺來云五臺寒色異常月川妙峯二老皆無恙因與訂游百泉之約記萬曆乙酉舅龔侍御仲慶謫官此地一年前伯脩夢侍御以州俸爲計偕錢至是侍御果謫州倅定

數之不可逃如此丙午中郎入補官予隨計  
偕黃縝軒以憲長官此地酒間出銅雀硯重  
大無欸識蓋亦近時贗瓦也

磁州道中多崇阜相傳魏武疑塚也過漳河飯  
于豐樂鎮風大作晚宿彰德府夜譚王無功  
陶隱居事頗有山棲之志

從彰德發過河徘徊文王羗里處飯于湯陰過  
嵇侍中墓宿于空溝

從空溝發見桃李盛開過子貢故里渡淇水水

清澈見石子慙有斐亭過殷墟宿于淇縣按  
水經注淇水亦名澳水詩云瞻彼淇澳菉竹  
猗猗毛註云菉王芻也竹扁竹也漢武帝塞  
決河斬淇園之竹木以爲橈寇恂爲河內伐  
竹淇川治矢百餘萬以爲軍資今通望淇川  
無復此物水邊多瓦礫耳王芻扁草亦無有  
也舊說菉竹指王芻扁竹非今之竹不知淇  
園亦自饒竹謝靈運山居賦自注云淇園衛  
之竹園在淇水之旁可証

寒食從淇縣發見輿人採青葉而食之乃榆葉也昔陽城屑榆爲粥卽此取嘗之甚甘過斷脛河飯于板野過比干廟夜宿衛輝府紂都也

清明迂道往輝縣游百泉風大作道旁有古槐一株甚虬屈近縣有白雲山登之可望原隰止于邑

風止天放晴騎馬出縣西門桃李芳菲秀麥盈疇五里許至蘇門山百泉息于書院竹篠叢

生亭臺間大有幽意已泛舟水面可百餘畝  
逐處皆泉如珠串上濺不可紀極澄澈見底  
萬年苔及菰蒲生其上泉水盪漾嫩綠深碧  
秀冶可愛時露石如綠霧近山下泉上沸愈  
多爲湧金亭其額子瞻書也舟折而右登清  
輝閣聞水聲甚厲已捨舟過瀆祠登堯夫安  
樂窩有樓可眺晏坐久之按康節慶曆間過  
洛愛其山川風俗之美有卜築之意嘉祐七  
年王宣徽尹洛就天宮寺西天津橋南以郭

崇韜廢屋餘材爲居三十間請康節遷居之  
富鄭公爲其客孟約買對宅一園有水竹花  
木之美夫以共城之秀美而更卜居豈以寥  
寥無友故耶有爲嘯臺下數百步爲公和土  
窟午餐中郎曰此共城稻也有山簌甚可餐  
訊之則云雞腸笋飯已過道院復登舟取水  
試茶在中冷惠山間憇于某姓者墅亦有樓  
可眺天晚宿霧大霽始見蘇門山外太行諸  
峯層疊可數此地偏據湖山之勝枕藉泉聲



真所謂流水聲中過一生也

游九山山去邑十里上亦有斧劈石偶于石上  
見一詩云一心貪與白雲期解帶歸來任所  
之每箇名山住幾月蘇門山上較多時嘉靖  
癸卯王受甫題語亦有致不知何人也又有  
吳門袁安節公名洪愈偕藩臬諸公同游題  
名字時爲嘉靖庚戌方爲中州少叅此山寂  
寞少游人不似蘇門故題字少予亦洗苔書  
數字遇有石如砥處布席小憩共呼大白見

太行蜿蜒天際若雕刻人馬虎豹花鳥種種  
形狀甚可愛玩而百泉之水隱隱一縷東不  
知其極也又聞太行之中如盤谷者甚多恨  
未能游焉間有洞可居至顛風大作晚馳下  
甚疲此山石理亦佳恨無樹耳予一月前屢  
夢登山一夜夢倚一石壁題字則先已有字  
鐫刻其上今日光景宛然九山以有九峯得  
名

渡黃河見廣武山中郎曰此卽連嵩少諸山者

也

鄭州途次有流水云卽賈魯河也

從鄭州發飯于郭店近店有謝花城不知何以  
名今邑內大隗山畔又有御花園相傳爲黃  
帝種花處晚過黃水其水流至縣城東北七  
里入于洧夜宿新鄭白樂天生于此邑東郭  
裴晉公呂正獻公著歐陽文正公脩皆葬于  
此地者也

中郎以眷屬病不成行飯後登高文襄公寶謨

樓盡一城之勝因出城息于濤洧水側有碑  
云子產乘輿渡人處善乎高文襄言之也云  
此當亦偶爲之耳卽如孟子言徒杠之成必  
十一月輿梁之成必十二月非四時皆可爲  
也洧出西山之近郊濤乃合流平時深及馬  
腹而已夏秋之間雨則山水泛漲高十餘仞  
奔騰而下不可以橋也子產乘輿濟人時月  
無紀豈十一月二月不成杠梁止假乘輿哉  
孟子恐人崇尚小惠有乖大體乃借此以立

論非真謂子產不知政也曰聖賢亦以乘輿  
濟人否曰不爲也亦非必不爲也偶然則無  
不可者譬之採荒者然彼其素有善政使家  
給人足大殺不惟上也野有餓殍開倉以賑  
次也若道遇餓殍且歿而簞有餘則亦飼之  
豈謂吾自有賑恤之政俟其自及雖遇餓殍  
且歿必不以餘食拯之歟子產之事有似于  
此甚確全文見本邑子產祠碑不具錄過  
橋登鳳凰臺上有塔詢僧不知所自復步歸

晚宿邑中

過溱洧始見油菜花黃花鬱然此地路若溪兩  
岸壁立皆千古人跡蹄輪所蝕而成積雨注  
焉二十里外爲漢水源發大隗山中路畔有  
仙姑洞從土穴達于顛得平坦地有數掾塵  
鞅倦極多暫停焉訊所云仙姑者魯姑也飯  
于子產鋪子產墓在此地故名當更名遺愛  
爲佳至禹州城外爲潁水石梁整潔可愛晚  
宿官署中脩竹翠栢宛似江南人家別業予

歲甲午曾住此月中飲青桐下今十七年矣  
從襄城發出城過汝水汝水發源于高陵山東  
南逕襄城城南說苑曰襄城君始封之日服  
翠衣帶玉徙倚于流水之上卽是水也城始  
以周襄王居之故名襄城矣楚盛周衰蚕食  
中原此城卽爲楚地所謂楚王城畔汝水東  
流者也前爲首山按天下名山有六而三在  
中國其一爲首山首山亦無奇峰異嶂不知  
何以厲行靈嶽豈以鼎湖重耶首山接紫雲

山中一竇如永巷古置關于此楚之險當在此方城山與此正相近故曰楚國方城以爲城又云楚爭強中國多築列城于北方以逼華夏故號爲万城唐勒曰我是楚也世霸南土自越以至葉垂弘境萬里故號万城然楚以方城爲金城而其中又有万城楊用脩疑方城卽爲万城非也方城在汝潁之間爲入楚第一關寔爲咽喉方城爲城無可疑者記黃魯直集中云曾作葉縣尉葉城南三百步



王三石先生集卷之四  
省禪師道塲也卽傳燈錄中葉縣省也今三  
戸蕭然安睹淨藍哉

從葉縣發路多磽确過澧河飯于舊葉卽葉令  
飛鳧處也息于保安駟光武昆陽大戰處也  
此路兩山映帶西掖之山稍近翠色撲人峯  
巒起伏不知何山東掖山稍遠嶽嶽有生氣  
暮至裕州

博望駟卽漢張騫故邑也往來題咏甚多惟李  
涪洲太史一詩云孤亭矚虛空危欄翼石壁

亭亭數株松雲霞發深碧起視羣巒層溪光  
亂相射盤梯花倒看入閣烟相逼雨過萬瓦  
鳴燈殘四村夕疎星楊柳來河漢看不隔不  
見問津人空思泛槎客獨存韻致無關故實  
至雨過萬瓦鳴燈殘四村夕尤爲佳境李大  
司馬一絕云清風亭下叅天柳歲歲看人觸  
熱行亦大有韻子夜烈風暴雨畏牆塌不成  
眠

抵南陽府壁間有予舊作鷓鴣天一闋尚未磨

去云尋去尋來度幾秋得來原在鼻尖頭祖  
翁一片閑田地昨日親將文契收身尚在意  
先休逢場作戲儘風流自從識得根苗後勸  
我愁時也不愁戊申春北還作也時偶有所  
入故口占云耳

夜話間坐客云嚴光會稽人光武未嘗游會稽  
不知何以爲故人也予曰嚴光南陽人以避  
亂客會稽考之任延傳云天下新定道路未  
通避亂江南者皆未還中土如董子儀嚴子

陵延皆待以師友之禮可知光之爲流寓也  
然子陵娶梅福季女爲妻豈避亂至會稽後  
始娶妻耶今人因後漢之誣遂以本地高賢  
爲產于他方良可笑也

林水駟沿路枳殼編籬已有襄中風景

從林水發過光武故里飯于范蠡鄉宛三戶地  
從新野發過白河飯新店此後多崇岡巨巒  
便與中州異矣

從呂堰發沿路多木香花開如錦幄風色甚惡

不見襄中諸山近樊城始了了渡浮橋息于  
城外館駟晚步城西大堤游龜山上有礫礫  
石石頗多佳者

游謝公巖巖以謝莊得名去城三里過大堤依  
山下遙見樓臺枕藉甚覺清麗堂後爲巖若  
長廊上有字乃至元年間趙清老祭陣亡將  
士文也上有泉淙淙下注由巖而右得小閣  
閣畔得徑路登山山上有樓有洞可瞰江  
游峴石寺過朝陽洞石壁甚秀稍爲室廬所蔽

左有一石卽所云疊翠石也又半里得寺寺  
之上有洞石壁上有字可識爲胡旦謝泌陳  
堯咨竇學下關一字字甚古健右有石亭亭  
獨立搖搖欲落卽峴石也石畔有石几石榻  
椰梅蔭之

游檀溪寺見瓔珞栢至萬山杜預沈碑處下卽  
王粲宅也有王粲井在焉下山息于慶德寺  
入隆中山水迴合最爲勝處按隆中乃襄之  
隆中非南陽隆中也而世以躬耕南陽一語

遂謂隆中在南陽不知秦始皇郡縣天下始  
寘南陽郡襄陽屬焉蓋漢荊州刺史治在南  
陽襄中俱南陽屬則武侯所云躬耕南陽正  
合荊州所轄統部言之耳世人自不深考輿  
地故作此疑也

游谷隱寺走麥畦中看古碑飯于潼口宜城道  
中見漢上山色青翠甚

從宜城發行數十里兩山出左右拔生動甚夜  
宿麗陽驛

從麗陽驛發山路崎嶇雨色黯黯晚至石橋驕  
散步畦間見農夫播種者頗覺田間之樂  
從石橋發綠雨若織晚至荊門州游惠蒙泉泉  
在西門外過橋度山足有雙泉出山下漚于  
池泉上沸若珠大約同蘇門百泉云泉上有  
黃魯直所書惠泉蒙泉字并黃平倩書過象  
山書院門外流水從石橋落于澗聲甚震裂  
雖旱潦如常至唐安寺佛頂上舊有珠光耀  
燦人今二者已去惟一佛額上尚存日已暮



不及細看

早發虎牙關楚之喉舌也過卓刀泉其土黑名  
爲墨城壯繆曾卓刀于此故名今荊州近玉  
泉亦有麥城正壯繆授命處墨麥二字訛也  
由建陽發晚過郡城外至沙市登予汎鳧舟初  
甚倦及月色照水萬里捲雪不覺身爲之輕  
南風大作不成行游于沙市月下傳叔霽聞予  
至携一壺來同至舟中晤言江月皓白不忍  
歸去至雞鳴始散

閏三月十五日還公安居簣簞谷

入公安城中城日濱江故三戶蕭然往時石浦  
河垂楊流水第宅喧闐今皆寂然矣

起散步竹中看新筍惟水竹筍漸出水竹卽淡  
竹也取漚取茹皆用此竹餘皆苦竹不堪用  
今人不知擇竹取漚多不效

公安有盜賊之變中郎與予自沙市歸中郎因  
初到沙市居室都未料理卽以是日歸是時  
予眷屬皆居竹林中郎以盜賊充斥命予移

至斗堤新居中有小樓可坐下有梔子二樹  
梔子亦名林蘭因名林蘭閣

竹笋出土漸多命園丁掃堦葉蓋是月竹子換  
黃葉生新葉也檢往年鑿鍾鋤畚之類老圃  
之興勃勃墻角上大笋二三莖長能礙墻取  
去作湯供午餐衲子寶方從沙頭來閒話

蘭澤雲澤叔王吉人從村中來云村中許象山  
之侄豕生兒至第七忽產一人面者頭全似  
人身乃類猴以舌外繳不停產已復生數猪

其人懼寘之雙田河中村中見者數百人兩  
叔及吉人皆親見者

早同靜亭舅方平弟連轡至二聖寺禮佛寶方  
邀入禪堂堂後靜室蕭寂甚俄聞龍君御將  
至遂先歸遣人迎之君御亦以詩來午後會  
君御于署中始得君超中風消息驚嘆久之  
後得君超書見其字跡端楷乃覺受病不深  
稍爲喜慰晚治一酌與君御對飲簣簣谷中  
至沙市送君御晚飲中卽宅宿于龍堂寺

來江上看舟脩理尚未完午至劉元定新市沈  
氏園栢徑甚佳池塘亦濶惜書屋大暗耳

冒雨往龍山書院送君御共飲一日午後傳叔  
膚至夜月明如晝別去宿于承天寺僧房蚊  
蚋如雷羣鼠蹏跳不休不成眠命小僕持一  
几至寺迴廊下坐看月天未明出城

同中郎赴朱上愚召于不關園有池可泛舟舟  
中相對劇譚

泛鳧舟新脩完已可住

往觀音寺看吳氏園園雖荒落然有老桂一株  
花卉粗具後有塘可泛舟多竝頭蓮予心悅  
之其直廉因許之成

往觀音寺前成吳氏園

冥酒招賀新舟諸客鼓吹綠竹合作遡舟而上  
觀者如堵牆水光皓淼歌聲語笑落波濤間入  
暮黑雲四生復回舟舊處風雨大作諸客始  
星散是夜江聲如撼

同方平晦之過靜亭舅早飢至中郎宅閒話歸

舟靜坐中郎遣人來云灰心已至龍堂灰心  
卽袁文煒中夫棄青衿出家者也俄灰心至  
舟出無念書并刻予心律一冊見寄

中郎乞一官舟共飲江上是日中郎病渴不能  
動匕箸予等亦倦無興然龍舟數隻飛舞水  
心亦可觀予久處歌舞之筵頗思清淨遂動  
歸興靜亭舅亦思歸共宿舟中夜溽暑不可  
支二更始解

同靜亭舅發舟還公安至中途風雨大作泊舟

北岸捲簾靜坐看風濤際天神思甚爽舅于  
雨中假寐鼾聲與水聲相答舟人云此去文  
村不遠須就民家泊宿予畏風濤令諸僕移  
舟去獨着屐持蓋走岸上吉人隨之舅初了  
不怖見予登岸亦來一魁梧丈夫自持蓋着  
水鞋走綠艸中相視而笑

箕簞谷新竹已上林翠色嬌婉甚開淨綠堂芳  
草漫徑急令童子鋤去拂拭几案靜坐入暮  
王尚父來共酌此中日少蠅夜無蚊蕭然似



冷秋也

午日居簣管谷諸親友携榼來飲飲罷自步梅  
花廊見一笋山廊簷遂折而上若有所避者  
故知此君之慧也枯而生笋有以也夫

檢書得伯脩白蘓參集不覺泣下若存時止得  
五十一歲耳

天新晴曬書及衣服王尚甫忽至入竹中閒話  
覺含雪霰氣午後同尚甫步羊兒堤一民舍  
有涼風留啜茶後往江上看水水大漲波濤

如沸頗有大木當江而下憇柳蔭少時便道  
過表弟龔遴甫因留飲坐叢篁間待月俄雲  
氣樓起如有雨至者遂散

飲于初月臺上夜溪燃爆竹數十宿鳥皆驚散  
坐竹中不出晚納涼谷門偶見紫微花一枝  
嫣然已開有老僕曰此花開則新米入市矣  
至艾家堰沿江岸行久之登汎鳧舟小飲江月  
浩白波濤涵湧望對岸柳色沉黑

開竹徑入溪竹中清涼沁骨夜坐簣簞谷門上

油水映月楊柳濯濯油水卽古之油江口也  
飲于初月臺友人云風冷冷月晶晶竹蕭蕭宛  
似夢中也予曰此語正可作詩料

入城還拜舊吳川令曷幼谷按曷姓前史已有  
之見南唐書又元微之詩司南却是曷曷苦  
乖切今邑姓作過音

至柳浪泛柳巷密柳遮樾涼風穿柳宿水陰氣  
肅肅

久不見中郎欲登舟舟人云北風未轉不若明

日辰往爲佳且令人趣寶方同去

早同寶方登汎鳧舟南風大作渡江張帆而上  
四開軒窻水聲風色涼甚日午已至沙市晤  
中郎登樓時樓尚未落成已了了見大江一  
泓浩白無際風帆往來如在几案前中郎曰  
此名硯北樓取段成式飲燕之暇常居硯北  
也樓前仍作三層樓一間不惟可望江卽松  
滋及安鄉諸山皆可見予謂近居有江有山  
卽是天與畫盡此中人作室尚不欲見天况

山水乎

辰過中郎硯北樓風色甚厲共對坐看一日書  
至劉氏園晤僧歿心忽悟春初往弔蓮池之  
夢園林阡陌宛如夢中所見又夢中見粉壁  
上數大字今果有數字始知會合前定非偶  
然也蓋蓮池以諸生出家歿心亦以諸生出  
家其事正同園中有池亭可坐有一中印土  
僧高鼻深目短鬚宛如今所繪曇摩狀不能  
漢語晏坐而已取一赫禰上有梵書有雷音

寺印及小西天諸國印其人日夜持呪病于  
龍堂寺灰心接至園中爲調治已痊日已西  
步至菩提寺景頗清寂記萬曆癸巳予住此  
無念亦來今十七年矣是時西川楊敦初名  
景淳以己丑進士令吳強項不事權貴改荆  
州教授來此地論學予見其所論不中窾大  
呵之遂面棗而去又與無念共坐殿上擊鍾  
一聲作一絕凡十聲作十絕聲動舉筆聲寂  
放筆無念及客等大驚其任氣恃才如此真

可笑也

賢方顯宗二衲往玉泉講席時玉泉寺脩成請  
北藏已久至度門法師如誨集沙門繙經衆  
請講楞嚴寶方度門高足也中郎與予共具  
大衆伊蒲之具四金附二衲往并有字達度  
門且欲以秋初從玉泉至青溪紫蓋不知果  
此願否也

有故人賀醇儒者以字來云身且灰無棺木不  
能無望于君家兄弟予與中郎共以七金與

之醇儒家素豪華少亦業儒有名諸生間父  
爲別駕與江陵相公爲姻婭藉沒江陵時將  
逮其父醇儒挺身出備受考掠其父獲免家  
素豪盛以賄漸貧晚遂不振予少時與有杯  
酒譙笑之歡見其病中語不覺涕之無從也  
至南湖偶有所見乃青樓舊妓欲市人作鬟婢  
者也忽忽如夢中事過新市園居主人尚未  
成行至後園塘水白于雪圍繞綠柳中真可  
作亭還過觀音寺塔下有老僧邀入喫茶云



寺如舟塔如帆須得一丈六金身佛鎮之不然載輕舟疾難安衆僧矣乞作一緣疏予笑而許之

看報得西洋陪臣利瑪竇之計瑪竇從本國航海來凡四五年始至初住閩住吳越漸通華言及文字後入都進所携天主像及自鳴鍾于朝朝廷館穀之蓋彼國事天不事佛行十善重交道童真身甚多瑪竇善譚論工著述所入甚薄而常以金贈人寘居第僮僕甚都

人疑其有丹方若王陽也然竇實多秘術惜未究其言天體若雞子天爲青地爲黃四方上下皆有世界如上界與下界人足正相鄰蓋下界者如蠅虫倒行屋梁上也語甚奇正與雜華經所云仰世界俯世界側世界語相合竇與縉紳往來中郎衙舍數見之壽僅六十聞其人童真身也

中郎捲雪樓已可登眺大江浩淼圍繞硯几望見遠山如畫下樓檢秦中石刻有對一聯長

天夜散千山月遠水晴收萬里雲乃杜少陵  
筆刻于秦中一山中石攀龍附鳳乃唐弘文  
館學士虞世南書在秦中書院歸雲堂字乃  
黃魯直書在密縣肇化寺內

從徐寓移至觀音寺塔下吳氏新居吳氏已移  
居予移行李其中入門叢桂一株爲瓦礫所  
侵急披剔之募工數人盡去草菜花石漸透  
露後園有老栢三株海冬青二株臘梅二株  
白梅一株石榴二株雜花尚有多種皆爲草

封園后臺上白水一湖澄人心脾而臺狹不可亭乃募土工益之大都置園以水爲主得水始可脩治此地據水之勝爲可喜也臺四周皆楮樹楮于樹爲下品然葉極濃其實殷紅可蜜其皮又爲帑而仙家服食中亦用楮實不知何以賤之乃爾豈謂其易生耶子瞻有宥楮詩卽此木也西日方熾時此樹重重遮蔽如含雲霞雖以珊瑚林易之吾不與也料理吳氏新園去其遮天障風者蓋沙津作宅

不欲見天與風故也

中郎來園坐臺上謂大有幽意飯后至十方菴  
少坐沿路深樹中語鳥鳴蟬相次街道如拭  
凡入城徑路之整潔卽南都不及也

夜月登捲雪樓大江浸几席時九市熱極皆呼  
風而此地特寒散木與予噤不止各飲數盃  
下樓

與崔晦之登舟散木繼至艤舟橋邀候中郎至  
至則維舟深楊樹下風色清冷頃之黑雲怒

雨大作入暮開霽隨舟蕩漾乘月過新居坐  
臺上夜分中郎乃歸是日立一亭後園亭係  
箕簞谷中物在亡友王官谷時名曰朋石館  
取朋于松石意也旣屬予伐去竹寘之睡香  
後名曰紫蓬菜取睡香舊名也自亡友去後  
江縣少韻人絕無種竹澆花者予遠游無人  
照管紫蓬菜亦槁矣箕簞谷屋宇旣多此亭  
亦漸歛側乃以舟載來于此東移西徙措大  
舉止自應爾也

北風甚涼水漸退登舟繫垂楊溪處晴雨不常  
如昨日

立臺上茆亭卽名曰楮亭以在楮樹中也水氣  
環抱

早至中郎樓下抄半日書

園脩理已有次第臺上茆亭可坐蓮花甚繁有  
客言此地決宜作一水閣不然可惜此一泓  
清流也是日市一五板舟此園花樹雖繁而  
叢桂爲君遂名爲金栗園云

得黃慎軒書大約謂秋冬之間必來相晤千萬  
勿他出也

珂雪堂外集卷之四終

珂雪堂外集

卷之四

三六